

# Pelajar Universiti Sultan Zainal Abidin berbakti di Kemboja

*Utusan Melayu - 6/11/2013*

KUALA TERENGGANU 5 Nov. - Misi Kemanusiaan ke Kemboja kelolaan Universiti Sultan Zainal Abidin (UniSZA) baru-baru ini bukan sekadar menyumbang di segi material malahan sokongan moral dan bimbingan keagamaan untuk dimanfaatkan penduduk Islam di sana.

Disertai 30 mahasiswa, program tanggungjawab sosial global itu merupakan hasil kerjasama Majlis Perwakilan Pelajar (MPP) 2012/2013, Pejabat Timbalan Naib Canselor Hal Ehwal Pelajar Alumni (HEPA) universiti itu dan Teluk Ketapang Homestay, Kuala Terengganu.

Rombongan peserta terdiri daripada ahli MPP, Majlis Kolej Kediaman dan Yang Dipertua Kelab, Persatuan dan Sekretariat terpilih diiringi dua pegawai HEPA telah menjadikan Kampung Masjid Batu 9, Kemboja sebagai pusat operasi bagi program selama seminggu itu.

Pengarah Program merangkap Exco Kebajikan dan Pembangunan Pelajar MPP UniSZA, **Muhammad Nursyazwan Zainudin** berkata, program itu memberi peluang kepada mahasiswa untuk berbakti kepada masyarakat antarabangsa terutama di negara Islam yang masih dibelenggu cengkaman kemiskinan seperti Kemboja.

Menurutnya, selain membimbing penduduk menunaikan solat



**ROMBONGAN** dari UniSZA bergambar bersama pelajar Dubai Islamic School ketika melawat sekolah berkenaan sempena program Misi Kemanusiaan di Phnom Penh, Kemboja, baru-baru ini.

dengan cara yang betul, peserta juga dapat mendidik diri supaya bermuhasabah dan bersyukur dengan nikmat sebagai rakyat Malaysia.

Selain menuntut ilmu, jelasnya, mahasiswa juga berperanan memberi sumbangan mereka dalam aspek yang bersesuaian demi membantu usaha membangun-

kan negara.

Dalam pada itu, kata Muhammad Nursyazwan, sumbangan wang tunai hampir RM6,000, bahan makanan asas serta kelengkapan harian berjaya dikumpul oleh mahasiswa, kakitangan universiti, orang perseorangan dan badan korporat untuk diserahkan kepada

penduduk kampung berkenaan.

Sementara itu, sumbangan berjumlah RM1,870 turut diberikan kepada Dubai Islamic School yang menjadi gedung ilmu kepada pelajar Islam berusia lima hingga 18 tahun.

"Sempena sambutan Aidiladha pula, kami mengadakan program

Ibadah Korban dan Akikah di Kampung Chanang, selain Kampung Masjid Batu 9 dalam wilayah Phnom Penh," katanya.

Tambahnya, sembilan ekor lembu hasil sumbangan komuniti UniSZA, badan korporat dan orang ramai dikorbankan sebelum diagihkan kepada kira-kira 400 fakir mis-

kin dan daripada jumlah itu, 3 orang turut menerima sumbangan beras.

Bagi Timbalan Mufti Kemboja **Muhammad Daud Kassim** berkata, program berkenaan membantu ringankan beban masyarakat Islam Kemboja yang merupakan golongan minoriti di negara itu.